

Pineqaatissinneqarsimasut tarnimikkut nappaatillit paaqqutarineqartarnerat katsorsarneqartarnerallu pitsaanerpaaffissaminniitinniarlugit aningaasatigut, allaffissornikkut peqqinnissakkullu sulisunik nukissanillu qanoq qularnaarisinnaanitta misissorneqarnissaa siunertaralugu nassuiaasioqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut Ilaasortaqaq Anna Wangenheim, Demokraatit)

Akissuteqaat

(Peqqissutsimut Naalackersuisoq)

Siullermeerneqarnera

Naalackersuisut siunnersuuteqartoq Demokraatineersoq Anna Wangenheim qujaffigaat.

Nunatsinni tarnikkut nappaatillit pillugit suliassaqarfimmut tunngasunik nassuiaatinik pingasunik Naalackersuisut 2024-mi saqqummiussaqarput. Tassa nassuiaatit "Kalaallit Nunaanni tarnikkut nappaatilinnik sullissineq", "Kalaallit Nunaanni meeqqat inuusuttullu tarnimikkut nappaatillit sullinneqarnerannik ineriartortitsineq" aamma "Tarnimikkut napparsimasut pineqaatissinneqarsimasut inuiaqatigiinni inooqataaleqqinnissaannik nassuiaat". Nassuiaatit pingasut tamarmik suliniutissanut siunnersuutiniq imaqarput, taakku maanna tarnikkut nappaatillit sullinneqarnerani aamma tarnikkut nappaatillit pinerluuteqarsimasut sullinneqarneranni pissutsinik pitsanngorsaaqataallutillu iluaqutaasinnaapput.

Tarnikkut nappaatillit sullinneqarnerat pillugu nassuiaatini unammilligassat aaqqiissutissatullu siunnersuutit arlallit saqqummiunneqarput, tarnikkut nappaatilinnik sullissineq aamma tarnikkut nappaatillit pinerluuteqarsimasut tassani atuupput. Tarnikkut napparsimasut pinerluuteqarsimasunik sullissinerup iluani pingaartumik assigiinngitsunik suliassaqarfisigut aamma suliatigut suleqatigiittoqarnerunissaanik pisariaqartitsisoqarpoq, innuttaasut tarnikkut nappaateqartut ingerlatseqatigiiffiit suleqatigiissutigisinnaasaannik, ataatsimut akisussaaffimmik aamma ataqatigiissumik suliaqarnermik pilersitsiniarlutik. Tamatuma peqatigisaanik suleqatigiinnermi matumani innuttaasut peqataatinneqarnissaat pisariaqartinneqarpoq. Sulisoqarnikkut isumalluutit amerlanerulernerisigut aamma suliffeqarfinni assigiinngitsuni piginnaasanik ineriartortitsinerit pikkorissaanerillu amerlanerulernissaat innersuussutigineqarpoq, innuttaasunik tarnikkut nappaatilinnik sullissisut tamarmik pisariaqartinneqartunik piginnaasaqarnissaat qulakkeerniarlugu. Aammattaaq suliffeqarnikkut ineqarnikkullu neqeroorutit naleqquttut, kiisalu immikkut ittumik innuttaasunut tarnikkut nappaatilinnut pinngitsuuisinnaajunnaarnermut katsorsaanerit ukkatarineqarnerulissapput.

Tarnikkut nappaatilinnut sullissinerup nukittorsarneqarnissaa aamma ineriartortinneqarnissaa Naalackersuisut anguniagaraat, taamaalilluni innuttaasut eqqugaasut sapinngisamik pitsaanerpaamik atugaqarnissaat qulakkeerneqassamat. Suleqatigiissitat assigiinngitsunik suliaqartut aningaasaqarnikkut, allaffissornikkut aamma tarnikkut nappaatilinnik sullissineq pillugu nassuiaatinit 2024-mi saqqummiunneqartunit atuutilersitsinissamik ukkataqartunut, suliniutinut ataasiakkaanut peqqissutsikkut suliaqarnikkut kingunerisassai pillugit erseqqissaasunik pitsanngorsaaqataallutillu

maannakkorpiaq iliuusissatut katalogimik suliaqartoqarpoq. Iliuusissatut katalogi UKA2025 saqqummiunneqarnissamut piariissasoq naatsorsuutigineqarpoq.

Tarnikkut nappaatilinnut sullissinermi suliniutissanut ataatsimut iliuusissatut katalogimik suliaqarnermik aallartisaareernermit innersuussinikkut, Naalakkersuisut ima allannguutissatut siunnersuuteqarput:

"Tarnikkut nappaatilinnut sullissinermi suliniutissanut iliuusissatut katalogiornermi tarnikkut nappaatillit pinerluuteqarsimasut paaqqutarineqarnerisa katsorsarneqarnerisalu aningaasaqarnikkut, allaffissornikkut peqqinnissaqarfimmilu suliaqartut isumalluutitut pisariaqartinneqartunut qulakkeerinninnissamik Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Iliuusissatut katalogi UKA2025-mi Inatsisartunut agguaanneqassaaq"